



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 8

Taoba Assam CM Sonowal Union
Cabinet nung shimoktsü akok

Kabul nung Australia
embassy shibangtsü: PM



VOL. XVIII NO. 221 (ADOK 221) DIMAPUR

RASEMNÜ (WEDNESDAY)

MONUPII (MAY) 26, 2021

₹ 5.00

COVID-19 Nagaland: Nisung 276 dak putet, 161 taneptsü angu & 18 asü

Kohima, May 25, 2021 (TYO): Mongulbarnü Nagaland nung nisung 276 dak COVID-19 putetba züngsema nisung ajak agi 20,535 kümogo.

"Tanü nisung 276 dak COVID-19 aliba putet. Parnokji Dimapur nung 119, Kohima nung 87, Mokokchung nung 19, Phek nung 17, Kiphire nung 14, Tuensang nung 9, Zunheboto nung 7, Peren nung 2 aser Mon o Wokha nung ka ka (1) lir" ta Health & Family Welfare Minister, S Pangnyu Phom-i metetdaksü.

"Nisung 20,535 rongnungi 14,798 taneptsü nguogo aser tang nisung 4,806 anepaludar" ta Integrated Disease Surveillance Project atema state nodal office officer, Dr Nyanthung Kikon-i metetdaksü.

"Tang anepalurtem rongnung nisung 172 dak shirangba yimya kar lir, 71 tera shiranga oxygen agi, 82 kanga shiranga oxygen agir, 25 ICU nung ventilator medeni anepalur aser nisung 10 ventilator nung lir. Nisung 4,446 dakbo shirangba yimya kecha mali" ta paisa ashi.

Nagaland nung COVID-19 nungi taneptsü angurji 72.06% lir, ta Dr Kikon-isa shisem.

Mongulbarnü COVID-19 puteta alir nisung 18 asü. Tasürtemji Dimapur nung 12 aser

Kohima o Mokokchung nung asemsem (3) liasü. Parnok züngsema tasür ajak agi nisung 315 kümogo saka nisung 12 bo tanga tashidak ajanga asü, ta paisa metetdaksü.

Nagaland nung COVID-19 puteter nisung 616 tashi tanga state temi ogo, ta Dr Kikon-isa ashi.

Nagaland nung COVID-19 alitsü akok ta temolung melemi bilemba sample 1,85,746 tendangogo. RT-PCR ajanga 87,608, TrueNat ajanga 54,142 aser Rapid Antigen Test ajanga 43,996 tendang, ta paisa ashi.

"Hombar tashi nung Nagaland nung nisung 2,05,454 nem COVID-19 vaccine indang dose 2,59,468 agütsüogo" ta State Immunization Officer, Dr Ritu Thurr-ia metetdaksü.

Vaccine agirtem rongnung frontline workers 57,061, healthcare workers 15,335, arishi küm 45 ser tempur 1,20,385 aser arishi küm 18 nungi 44 tsüngda alir 12,637 dena lir.

"Parnok rongnungi nisung 54,014-i vaccine indang dose anaprong agiogo. Parnokji frontline workers 27,911, healthcare workers 10,174 aser arishi küm 45 ser tempur 15,929 lir" ta Dr Thurr-isa metetdaksü.

Powergrid-i Referral Hospital nung transformer ka amenoktsü

Dimapur, May 25 (TYO) : Tang ama alima tashidak wara tesashi agi nübortem timtemba mapang shirangertem light maruba ajanga timtem takoksa majurutsü atema, tan ita May 22 nü to Referral Hospital, Dimapur Sub Station nung Powergrid purtemi 10 Mega Volt Amperes(MVA) transformer ka amenoktsüogo.

" Nagaland government-i mepishiba ama, Powergrid engineer-temi timtem talila agia anogo ana tsüngda Referral Hospital Sub-station nung 10 MVA transformer ka commission sütsüogo. Iba yagi Referral Hospital anasa Naga United

yimtak amenoka aliba Oxygen plant (BMA's Liquid Plant) nem anogo nung kena maneni ghonda 24 Rongmei Feeder, Sub Station nungi 11 kV ajanga electric tashi peria agütsütetsü," ta yashi Powergrid sangdong ka nung metetdaksüogo.

Nagaland nung oxygen adokdaksüdak ka dang lir, ibaji BMA'S Liquid Plant ya lir. Powergrid yagi Northeast nung Assam, Manipur, Meghalaya, Mizoram, Nagaland aser Tripura state government-tem den longjemmer light peria agütsütsü asoshi sentong balala atonga inyaker.

Hindu nunger alidak nashishi machitsüla: Assam CM

Guwahati, May 25, 2021 (Agencies): Assam Chief Minister Himanta Biswa Sarma-i state nung Hindu nunger aliba tesemtem nung nashishi machitsü mepishia metetdaksüogo.

"Asenoki nashi ya asen tetsü ama amanger. Asenoki nashi külemba tesemtem nung nashishi mechidaksünür" ta CM Sarma-i Assam Assembly nung ashi.

nashi shibelenba mapa meinyakdaksütsü. Nashi külemba tesemtem nung nashishi machitsüla" ta paisa ashi.

"Constitution of India-i nashi kümzüka ayutsü ashiba ama Assam nung ozü sorkari mapa ajak inyaktsü. Constitution nung Directive Principles of State Policy ajanga nashi tepsetba anendaksütsü shia lir" ta Sarma-isa shisem.

Nagaland Police Referral Hospital nung Covid-19 hospital lapokogo



Mongulbarnü Nagaland Chief Minister Neiphiu Rio-i State Institute of Hotel Management, IHM nung Covid-19 makeshift hospital semdangba agiba noksa angur. (Dimapur, May 25)

Dimapur, May 25, 2021 (TYO): Mongulbarnü Nagaland Chief Minister Neiphiu Rio-i Nagaland Police Referral Hospital, Chumukedima nung Covid-19 hospital lapoktsüogo.

Yipden 30 aliba Covid-19 hospital nung ICU 7, oxygen beds 5 aser oxygen concentrators 15 lir aser iba atema Chief Minister Rio-i pelaba metetdaksü.

Kasa complex nungsa yipden 75 aliba Covid-19 hospital yangludar aser tanü CM Rio-i ibajia semdangogo.

State Institute of Hotel Management, IHM nung Covid-19 makeshift hospital semdangba mapang CM Rio-i osangbener den jembidag "Ita ana tsüngda Christian Institute of Health Sciences & Research (CIHSR) campus, Dimapur nung yipden 176 aliba Covid-19 hospital ka yanglutsü" ta ashi.

"Iba mozü ki yangluba nung

Rs. 30 crore endoktsü. State sorkarisa CIHSR nung Covid-19 yipden talila bendenloker aser nüngdakba mapa ajak inyaka arudar. CIHSR nung ICU yipden aika den operation theatres aser tanga facility aika lir" ta Rio-isa ashi.

"State sorkari district ajak nem nüngdakbatem kasa lezmüksür. Nagaland nung Covid-19 agi shiranger 60% ji Dimapur nung lir aser iba jagi parnok nem timba agütsür. Noklak dak alaka district ajunga nung iba wara prokshioogo. Tang tashi nung Noklak nung Covid mali aser ibaji parnok meta talangka pilar aliba dang masü saka lockdown akangkanga inyakba ajanga lir" ta Chief Minister-isa metetdaksü.

"Sorkari yimtsüngtem nung iba wara prokshiba azüoktsü atema temolung agütsür. Onoki akokba tashi vaccine agütsür aser talila alir, kechiyong Covid anema

raratsübaji vaccine dang lir" ta paisa shisem.

Tanü CM Rio-isa CIHSR nung yipden 176 Covid-19 hospital yangluba semdang.

Paisa District Hospital Dimapur semdang aser PSA oxygen generation plant reprangdanga liasü.

Maneni, CM Rio-i tanü 10 CIHSR sub-station nung 10 MVA transformer mapa tenzükja liasü. Iba transformer ajanga oxygen plant aser temeket aliba tesemtem nung power supply agütsütsü.

"Covid-19 atema Team Dimapur, frontline workers, civil societies, arogotem aser sendaktepa alir ajaki iba wara anema longjemmer noktakba atema pelar" ta CM Rio-isa metetdaksü.

Tanü Deputy Chief Minister Y Patton, Health & Family Welfare Minister S Pangnyu Phom aser tangartemi Chief Minister Rio meina liasü.

DIMAPUR AREA AO BAPTIST CHURCHES & DIMAPUR BASED AO CIVIL SOCIETIES

Date : 24th May, 2021.

COVID-19 TONGPANG NUNG SHILEM AGITSÜ AYONGZÜKER :

Yaküm 2020 küm Covid-19 tashidak wara asen lima tashi tonga arur nübortem tetsübu aser shisabolu nung alidang arogo, lokti tentet aser kija kibong aikati mulungsua tenla tulu agütsüba ajanga Dimapur Area Ao Baptist Churches & Dimapur Based Ao Civil Societies longjemmer Dimapur nung Quarantine Centre asem tashi lapoker, Tsüngrem taochi agi kanga takok ngua anepalutetogo. Iba Quarantine Center asem tashi nung anogo 20 nü tashi nisung 245 nüngdak ajak peria agüja anepalur külenang, ano, sen aika anüngba agi Covid wara nokdangba tongpang asoshisa amshitsü atema Dimapur District Hospital (Covid Hospital) nung Multi Public Utility Center ka sen lakh ter agi renemtsüogo. Iba kiji tang Covid Vaccination center kümer amshidagi.

Idakji asenok tenla aser sarasadem manener, kechiyong takumbo ano yaküm dang nungi tesashiba Covid wara agi asenok menepogo. Iba tongpang nung ya Health Worker-tem den asenok senso shiai pei akok shilem agitsü tensa mapang agi akanger. Atangji, kija, kibong, arogo aser lokti tentet aikati iba tongpang nung shilem agi tenzükogo. Item teyaritem ajanga tang tashi nung Covid mozü kitem nung chiyongtsü nungi tenzükger Oxygen concentrators, cylinders, regulators, PPEs aser tasümang atema süngden tashi tenla agütsüba angur.

Ano, item nüngdak ajak dakji alaka, tang asenok ajaki kanga bendanga agüja inyaktsüba rongdak nüngdak mapa kaji, Covid Hospital-tem nung inyaker, Health Worker-tem temang aser tanüla nüngdak ajak agüja iba tongpang tesashi nung tashi aser tasü itta nokdaktetsüsa yaritsübaji lir, kechiyong mozü kidang nüngdak osettem aser oxygen ajak peria aliyonga, asenoki inyakerteremji junga anepalu mesütetra mozü ki ajak shibanga ayutsüsa akümtsü. Tang asenok ajak atema teblemtsü tulutibaji aji lir.

Iba teblemtsü aser rongdak nüngdakji reprangteta, Dimapur Area Ao Baptist Churches & Dimapur Based Civil Societies ajanga Dimapur district nung aliba Covid Hospital-tem nung inyaker Frontline Worker-tem nem tekaratiba nung chiyongtsü agüja anepalutsü telemtetba agiogo. Anungji, ano maneni kija kibong, arogo aser lokti tentetemi iba sentong takok ngua inyaktetsü asoshi mulungsua rongsen tenla agütsüdaksünener. Tenla agütsünertemi pei alidak Ao Baptist Arogo sannüker ajanga agütsütsü akok mesüra tsünglangen agüja aliba lenirtem den tongteprateptsü akoktsü :

Pastor, N.Lipok Jamir (Diphupar) - 96153 70625
Mr.Toshi Longkumer, Mission Director (DABA) - 94360 03553.
Pastor, L.Panger Jamir (Unity Village) - 94360 79522

Sd/-
Supu Jamir, Convenor (94360 16389)

Sd/-
Imti Jamir, Secretary (98624 08970)

Don Bosco School Zubza nung COVID-19 Care Centre amenoktsü agütsü



Don Bosco School, Zubza nung Sechu-Zubza sub-division nung aliba nübortem asoshi COVID-19 Care Centre amenoktsü atema May 25, 2021 nü DTF Kohima nem melaogo

Dimapur, Monupii/May 25 (TYO): Rector & Parish Priest Catholic Church, Sechu Zubza, Fr. Nellisseril Joseph ajanga Don Bosco School, Zubza nung Sechu-Zubza sub-division nung aliba nübortem asoshi COVID-19 Care Centre amenoktsü atema May 25, 2021 nü DTF Kohima nem melaogo.

DTF Kohima nem iba temelaba ya SDO (C) Sechu Zubza, Tiayanger Jamir ajanga Medical Officer, Sechu-Zubza; Sechu-Zubza yimten yimsüsür aser NGO tem lia agütsü.

Iba school kidang ya yipten 40 (tebur atema 20 aser tetsür

atema 20) den doctor aser nurse tem alitsü atema facility agütsütettsü.

Don Bosco School ajanga mapang ajak nung nübortem tang alima ajunga nung tashidak wara tamajung agi sünger aikati yariteptsü nungnanga aliba mapanga yaritepba atema pelar, ta SDO (C) ajanga lemsatsep.

Pai Parish Priest aser Don Bosco School, Sechu Zubza nung tangloka alir ajak aser talisa Catholic nung dang pelaba lemsatsep.

Sorkari yimtak-yimtsüngtem nung COVID-19

Care Centre amenoktsü ya tensa tamajungtiba nung ang asameyanger.

Mapangtong nung Government High School Zubza ya doctor aser frontline worker atema facility quarantine centre kumdaktsütsü, ta SDO (C), Tiayanger Jamir-isa ashi.

Paisa Western Angami area nung aliba nübortem dang iba tashidak ketdangsuba nung lungjemmer yariteptsü aser sarasademtsütsü ayongzüka liasü.

Sechu-Zubza indang yimtsüng ketdangsur aser NGO temia Parish Priest dang pelaba lemsatempa liasü.

COVID-19 tongpang nung nokdaker dang pelar: NSCN (R)

Dimapur, Monupii/May 25 (TYO): Kodanga majangshiba tashidak wara ya ajanga NSCN/GPRN animesüngzükteter, koba agi meimchi takum aser libaliru atema timtem tulu agütsür, ta NSCN/GPRN (Reformation) indang MIP (Ministry of Information & Publicity) sangdong ka ajanga ashi.

Iba ama tensa nung NSCN (R) ajanga iba maongka agia frontline aorker dang pelar aser tenüngsang agütsür, shirnoki iba tsükchir tamajung den raratsü atema pei takum bendanga agütsür, ta ashi.

Ibai rara tabu ka lir, kong prangbong, nok-o-nü, tasü tait, tashi tulu aser asükum yimya menüngdak, saka meimchir ajunga atema bilemba, meranga nokdakba, tazüokba aser temeim nung pei takum bendanga agütsüba nüngdaker, koba prangbong agi raraba dang tesashiba lir, ta sangdong ajanga ashi.

Aser yamaji state sorkar, doctor, nurse, police, NGO, political party, arogo aser kijai pei akokba nung mapa tajung inyakba ya amadoktsü aser senzüka yutsütsü makok.

Nagaland, aser talisa Dimapur, koba iba rara atema tiyongtsü aser tongpang raraba tesem ka lir, yangji aseni moa Kikheto Sema IAS (APC) ama tetemjen lenir ka yokba atema Nagaland state sorkar dang pelar, shiba Dimapur Area

indang Nodal Officer ka lir aser pa lenisüba kübok sentong yanglua mapa inyakyonga aor, ta NSCN/GPRN ajanga ashi.

Ajidang masü, Commissioner of Police, Rothihu Tetseo; Deputy Commissioner, Dimapur, Rajesh Soundararajan aser CMO Dr. Antoly nungertem yakbang nung tsükchir den raratsü atema par kübok alirtem anir nokdaka lir, aser parnoki pei mapa nungi jenzük-jenshia maor.

Ajidang masü, Arogo balala/NGO/Political party aser kija-kibongi iba tongpang nung shilem agiba atema tenüngsang agütsür, shirnoki pei akokba yarir, tatishitsü agi WSBK (Western Sumi Baptist Akukuhou) ajanga ambulance angati agütsüba, Dr. Sukhato (Proprietor of Faith Hospital) ajanga angati temang reprangba, mozü agütsüba, Basu Damani (Proprietor of the Medicos) ajanga Oxygen Cylinder angati agütsüba, Arvind Damani, National Co-incharge Northeast BJYM (Bharatiya Janaha Yuva Morcha) aser Benjamin Yeptho, Nagaland BJYM tir ajanga senotsü, nübortem aser osettsüset balala agi yaritepba atema pelaba lemsateper.

Telok balala/CSO, kija-kibong densema frontline worker ajak tenüng mezüngsemba atema kanga

sasar, saka nenoki anibelem mesasai bendanga agütsür inyakba atema Tsüngremi ngua lir aser Pai na aser ner kibong moatsütsü, ta sangdong ajanga ashi.

NSCN (R) ajangasa züngsem ajak dang, teyari agütsür dak nungi senotsü teyari imlatsü mesüra bushitsü melena tang ya nübortem nem aseni meyiper agütsütsü mapang aser maongka alinung, asen nüngdakba mapang atsükshia melie pei akokba yari yariteptsü ayongzüker, ta sangdong nung shia liasü.

Maneni züngsemtemi tang tashidak wara agi sünger aser lockdown mapang shishilembar, contractor, office department, temeimer, nübortem mesüra shinga danga amokmeren masütsü aser yamaji inyakba kar danga metetra, NSCN (R) ajanga tatok magütsütsü, ta ashi.

Ajak atema mapang kaka lir, aser tajung mesüra tamajung ajak süitema aotsü, anungji nübortem ajunga lungjemmer asen asoshi iba tashidak wara den raratsü sensosanger ajunga ayongzüker.

Lokti asoshi asenok tongtipang ka mesüaka dangar asoshi khuret mesüdaktsütsüla, anungji asenok kumzüka alitsü atema sorkari agütsüba SOP sülen anidaktsü ayongzüker, ta NSCN/GPRN (Reformation) sangdong ajangasa ashi.

ABAM-I SEN 2 LAKH AGÜTSÜ



ABAM ajanga lokti, arogo aser kija kibong shirnokisa sorkar den amalitepa COVID-19 wara raraba nung yaritepa arudar kangasa pelar.

Sorkar ajanga akokba tashi tashitak nungi kumzüksü asoshi tapet mapa jenti inyaka aruaka, tanü asen linük nung takoksa ajangshia odar, ya asoshi kangasa sasar. Ajisaka, tanü tashi tongtisa inyakertemi maneni taküm agüja nübortem kumzüksü asoshi inyakba angudang kangasa pelar aser par mapa asoshi akhüm tulu agütsür. Tsüngrem shibai alima odang meimer, pai iba wara tesashi nungi kumzüksü tamang ayur.

Tanü asen linük nung aser talisa asen state nung tanen makai wara den rarapa ngua, ABAM-a iba tongpang nung külemi lir aser sarasadem nung nungiter ta asüba temaitsü May 25, 2021 anogo ABAM tenüng nung Rev. Dr. Mar Pongener, Executive Secretary ajanga Deputy Commissioner office nung Mokokchung Task Force COVID-19 relief fund nung amshitsü asoshi sarasadema Rs. 2 lakhs agütsü.

ABAM-i maneni taneptsü asoshi Tsüngrem dang sarasademer aser ajak dang sorkar ajanga koba tekümdangtsü tetuyuba agüja lir, itemji akok tashi benshiba ajanga külemi iba wara tongpang koktetsü ta ayongzüker.

Sd/-
Rev. Dr. Mar Pongener
Executive Secretary, ABAM.



Shamator nung Goodwill Mission kübok jang lema agütsüba sentong ka May 25, 2021 nü agia liasü. Iba sentong nung Kroshu ajanga jang bag 45 tenla, koba BPL kübok nisung 200 dak tema nem iba jang ya agüja liasü. Shamator nübortem tenüng nung Advisor, Ward Union of Shamator, Tsurito ajanga Kroshu aser kibong dang pelaba lemsatsep aser district administration ajanga iba sentong ahitsü atema melaba asoshia pelaba shisem. Ward 11 prong nungi tir aser teshimtet nübortem lia jang ya lema agüja liasü.

Peren district-i Ak belener arutsü memelar: Peren DC

Dimapur, Monupii/May 25 (TYO): Kiphire, Mon aser Phek district tem nung African Swine Fever ajanga alitsü südi ta temolung melettsüsa ak onsara asüba ajanga aser nübortem kumzüka ayutsü mechi, Peren district tezülen nungi shi achitsü aser metsütsü

atema ak bener aruba nokdanger, ta Deputy Commissioner, Peren, Sentiwapang Aier ajanga sangdong ka nung metetdaksü. Iba totuyuba nung aibelener nem ozüng agi melaba ama temerenshi agütsütsü, ta sangdong ajangasa ashi.

Hindu nung alidak ... (TAPAK 1 NUNGI...)

"Ni nisung shinga danga chiyungtsü achiba melentsüba mashir saka ni aiben Lucknow nung Darul Uloom ajanga Muslim nung Hindu nung alidak nashishi machitsü ashiba aiben angashio" ta Himanta Biswa Sarma-isa metetdaksü.

"Fancy Bazar mesüra Gandhibasti mesüra Santipur nung Madina hotel alitsü nüngdak mali kechiyong item tesemtem nung Hindu nungera lir" ta Assam Chief Minister-isa ashi.

Honibarnü Assam Assembly session tenzüka anogo nung Assam Governor Jagdish Mukhi-

i "Assam nungi aser tangalen nungi nashi shibelen masütsü atema state sorkari cow protection bill ka yanglutsü" ta metetdaksü liasü.

"Onoki zero-tolerance policy latettsü aser aibelenerem akangkanga merenshitsü. Asenok ajaki nashi akhümsübur aser külemer. Nashi ya temeshi shiruru ka ama züngshir kechiyong nashi mamatzü ajanga asenok yarir. Ozü sorkari Cow Protection Bill ka benoktsü sentong aliba osang kanga pelaa metetdaksür" ta Governor Jagdish Mukhi-i ashi.

Tripurasorkari COVID-19 osang shitak mashir: BJP MLA Sudip Roy Barman

Agartala, May 25, 2021 (Agencies): BJP-i aniba state sorkari COVID-19 tebilemtsü atema mapa shitak meinyaker ta taoba Tripura Health minister aser BJP MLA Sudip Roy Barman-i tai tongloksüogo.

Tripura sorkari anogoshia COVID-19 putetba aser nisung asüba osang yagi ajak mabensar, ta Sudip Roy Barman-i ashi.

"Lokti dak tendangtsüla. Anogoshia osang sangoktsüba yabo tilateri lir. Parnoki ashiba osangji masü saka iba dang nungi khuret tuluba lir. Nisungtem dak shitak metendangba ajanga Covid aketertem meputet lir" ta paisa ashi.

"Sorkari lokti dak tendangtsüla aser mapang telatet ka nung vaccine agütsütsüla. Sorkari shishilembadak nisung lokti madenshidaktsütsüla aser local train tem senzüba anendaktsütsüla" ta Barman-isa ashi.

"Corona Care Centre nung COVID-19 agi shirangertem nem chiyungtsü shitak magütsür. Sorkari parnok nem chiyungtsü tajung agütsütsüla. Anogoshia shiranger ka nem chiyungtsü agütsüba nung Rs 380 endoker ta ashir saka shirangertemi chiyungtsü tamajung agütsüba shiogo. Iba maparen mita repranger shinga mali anungji sorkari chiyungtsü

agütsüba mita reprangtsüla" ta paisa metetdaksü.

Agartala nung aliba GB Pant Hospital ka covid care centre lir saka iba mozü ki ya molumi indang kishizüing lir.

"Na kodang GB Pant hospital nung aniokdir, shisabulu khuret tulu ajurur aser iba mozü ki ya molumi indang kishizüing ama lir. Na meyipa aotsü asü masü'ar meshiteter. Tang Tripura nung health minister ka nungdaker. Chief Minister-i home, DWS amala tongtipang department tem ketdangsur anungji pai mapa ajak mayimjemer. State nung health minister balaka alitsüla," ta Sudip Roy Barman-isa metetdaksü.

Taoba Assam CM Sonowal Union Cabinet nung shimoktsü akok

Guwahati, May 25, 2021 (Agencies): Taoba Assam chief minister Sarbananda Sonowal Union Cabinet nung shimoktsü akok.

Sonowal ya Majuli Assembly Constituency nungi MLA lir aser Himanta Biswa Sarma nem lenmang lapokja chief minister menden nungi sodi agi.

Sonowal ya Assam nung chief minister tanaben inyaktsü meshimba ajanga Union Cabinet reshuffle nung pa shimoktsü akok. Iba mapang taoba Congress züingsem Jyotiraditya

Madhavrao Scindia shimoktsü akok ta osang ka ajanga ashi.

Sonowal ya mezüing Rajya Sabha züingsem ka kümdaktsütsü aser iba sülen Narendra Modi-i aniba Cabinet nung Minister kümdaktsütsü.

Taoba MP Biswajit Daimary Assam Legislative Assembly nung Speaker inyaktsü shimba sülen menden ka tazüing kümogo.

Sonowal-i totsüba Majuli assembly constituency nung by-election agira BJP MP Pradan Baruah tokteptsü akok aser pa Himanta Biswa Sarma-i aniba

Assam cabinet nung shimoktsü ta osang ajangasa ashi.

Sonowal ya taoba All Assam Students' Union (AASU) president liasü aser February 8, 2011 nü BJP nung aden.

Sonowal ya Centre sorkar nung sports minister inyak aser iba sülen Assam sorkar nung inyaktsü atema aru. Pa ya Sonowal-Kachari lisopur kin nungi lir aser tenüing tajung yangluteta lir.

BJP-i Sarbananda Sonowal aser Himanta Sarma tsüingda chief minister shimtsüba atema mapang talangka agia liasü.

Assam police-i tanur kiyimba sentong magidaktsü

Barpeta, May 25, 2021 (Agencies): Assam kübok Barpeta nung tanur den kiyimba sentong agiba dak sendakba nung Kalgachia police station nung ken o ka benokogo.

Iba ken o atema police-i kiyimsang aser kiyimla tetsü puogo.

Iba sentong ya May 21, 2021

nü Dabandia yimtsüing nung agia liasü.

"Osang tejangka ka angazükba sülen Barvitha outpost (OP) nunigi telok kati tanur kiyimba sentong agidaki ao aser kiyimsang den kiyimla tetsü apu" ta police ketdangsur kati ashi.

Kiyimsangji Noor

Muhammad (25) ta jangjaogo aser pa ya Kalgachia police station kübok Bonghughi yimtsüing nungi lir.

Noor Muhammad yagi arishi küm 17 tain tanur tetsür ka den kibong akümtsüba liasü. Iba dak sendakba nung maneni bushisüingdang südar, ta police ketdangsurisa shisem.

Arunachal Police-i YouTuber Paras Singh aputsü atema apusogo

Itanagar, May 25, 2021 (Agencies): Mongulbarnü Arunachal Pradesh police telok ka Chandigarh-i apusoa ogo aser parnoki YouTuber Paras Singh-i Arunachalee nung mezüingmeshiba ken o bushisüingdangtsü.

Tawa YouTuber Paras Singh-i video ka yanglua prokshiba ajanga Arunachal Pradesh nung dang masü saka Northeast state nung alirtem jashidaktsüogo.

Union Sports Minister Kiren Rijju-i Ludhiana nung Police Commissioner den jembiogo aser tai tonglokja alisang Arunachal Pradesh-i anir arutsü atema mapa yariteptsü ashi.

"Iba ama tangatetba ajanga linük longjemba nung timtem bentsür arur. Union Home Ministry-i State aser UT ajak

dang North-East nung kümzüka ayutsü atema tetuyubatem agütsüogo" ta Rijju-i ashi.

Arunachal Pradesh Chief Minister Pema Khandu aser Deputy Chief Minister Chowna Mein nati iba inyakim khukhua aitsüogo aser tatok meshitsü takhangba agütsüogo.

Manipur aser Meghalaya Chief Minister temia Arunachal pusema nungitba den YouTuber aitsüogo.

YouTuber Paras Singh-i Arunachal MLA Ninong Ering anema jemi aser Arunachal Pradesh nung tereprangtsü nung ajemdaker lutsü.

Külen, Arunachal Pradesh nung Adi kin nung Supreme Council- Adi Baane Kebag (ABK)-ia YouTuber Paras Singh anema ken o ka benokogo.

ULFA-I-i PREPAK züingsemtem asüba atema mang ayimer

Imphal, May 25, 2021 (Agencies): People's Revolutionary Party of Kangleipak (PREPAK) züingsem asem gari lendong ka nung asüba atema mangyimer ta United Liberation Front of Asom-Independent (ULFA-I)-i metetdaksü.

Tasürtemji Khuujan Ratan, Mayengbam Joyce, aser RK Ramananda nungertem liasü ta jangjaogo.

"WESEA region atema nüjiso atema rarar ketdangsur tajungtem akoksaba dang masü saka Manipur lima atema bendanga agia inyakertem samaogo" ta ULFA(I) spokesperson Rumel Axom-i ashi.

"Putiotsü nung parnok kodanga mamatsü aser Manipur balaka kümteta aotsü maparen inyakba nung parnoki tarutsü pututem ajungmesotsü" ta paisa ashi.

"Chairman Khuujan Ratan, general secretary Mayengbam Joyce aser GSO1 RK Ramananda nung lendong nung asüba atema ULFA-I tenüing nung ni People's Revolutionary Party of Kangleipak, Manipur sensotem aser tasür kibongtem den asükhu lemsateper" ta Rumel Axom-isa metetdaksü.

Deobarnü PREPAK lennirtem ya arem nung gari lendong ka nung asü.

NEHU kaketshir kati Meghalaya Governor dangi shidi zülü

Shillong, May 25, 2021 (Agencies): North Eastern Hill University (NEHU) nung kaketshir kati Meghalaya Governor Satyapal Malik dang Covid-19 wara mapang Vice Chancellor Prof SK Srivastava maliba atema shidi ka zülüogo.

NEHU nung English department MA 4th Semester student Constantine Dohtdong-i Meghalaya Governor dang NEHU indang Vice Chancellor kong lir'ar metetnua asüingdang.

Prof S. K. Srivastava ya April 18, 2021 nungi Campus

nung manguba osang angazüker ta Dohtdong-i ashi.

"Pa maliba ajanga kaketshirtem ratateper aser tang tatidang tagidak aser ano hostel inyakim atema tongtipang telemtetba aika magiteta lir. Item ajakji Vice Chancellor lia agitsüla" ta paisa ashi.

Iba ama mapang ka nung Prof SK Srivastava-i kaketshirtem aser University len anitsü teinyaktsütem meinyaker" ta Dohtdong-isa Governor dang ashi.

GOVERNMENT OF NAGALAND

DIRECTORATE OF TECHNICAL EDUCATION NAGALAND::KOHIMA.

NO.DTE/ESTT/2/4/2016-17

Dated, Kohima the 25th

May, 2021

NOTIFICATION

In continuation to this office notification of even number Dated 3rd May, 2021, and in view of COVID-19, Pandemic, the last date for issue/submission of NSEE and Diploma forms are hereby notified as under:

Nagaland Entrance Examination(NSEE):

Last date for issue and submission of form : 15th June 2021, 5PM.

Form can be downloaded through website www.dtenagaland.org.in

Form fees :Rs.200/- per form

Mode of submission :Online only.

Mail address for online submission :dtenagaland@gmail.com

A/C detail to deposit form fee : Bank : SBI, Capital Complex, Kohima.

A/C No.39210279019

IFSC Code: SBIN0016933

All necessary documents along with receipt of application form fees to be submitted online.

Helpline for NSEE: 7005233190/9856984703

Diploma Entrance Examination(DEE):

Last date for issue and submission of form : 30th June 2021, 5PM.

Form can be downloaded through website www.dtenagaland.org.in

Form fees :Rs.300/- per form

Mode of submission :Online only.

Mail address for online submission :sctenagaland@gmail.com

A/C detail to deposit form fee : Bank : SBI Capital Complex, Kohima

A/C NO.39210279019

IFSC: SBIN0016933.

All necessary documents along with receipt of application form fees to be submitted online.

Helpline for DEE:9402841579/8974956638

Stay Home! Stay Safe!

Sd/-

Ex-Officio Director
Technical Education, Nagaland.

Issued by DIPR

Happy Birthday

TENÜNG - LYDIA PONGEN

Tasoba - 26 May 2015

Küm - 6

Class - B

School - Care Well School

Talidak - H No 103, Kashiram, Dimapur

Tasütsü wara lendong teimtem nungi

kümzüka anir, tetemjen taküm

nüngdakba ajak perija, küm 6 tashi

anir arua moatsüba, Tulusang

Teyanglur Tsüngrem tenüing asanger.

Tanüngba arishi anogo tem Tsüngrem-i moajangma ta

sarasademtsür.

- Temeim, Apa, Mummy, Molungti, Otsu, Oko Jilo,
Monglong aser Akhosa.





TIR YIMYIM YIMOBILEM (EDITORIAL)

DIMAPUR RASEMNÜ, MONUPII (MAY) 26, 2021

Tolongjem ya tang nungdaker

Nagaland ya lokti tentet telongjem aliba lima (land of Unions) ta aiben aikati menüja jembir aser aji temenütsür amato saka shitak lir. Asenok nisung mashi kati, süra nia telongjem tentet kwika nung dena lir ta sükdangra, arogo telongjem nung adenba mezüangi Ao Senden ta asüba amato, pei kin tematiba lokti tentet nungi shir pei tükong, pei yim, pei kiyong, pei kidong, watsü, lanur, kaketshirtem ta tajemba agi telongjem tentet pongo trok ka nungbo dena aliba sükdangtetsü. Ano, naji town nung alir ka süra yangjibo Naga kin telongjem nungi shir ano kasa pei kin, tsükong, yim, watsü, lanur aser kaketshir telongjemtem nung maden majung shilem agiba angutsü. Atangji, nisung ya kija ali majung ta Tsüngremia reprangtet, anungji nisungji lokti nung alitsüla aser iba loktiji liromedema aotsü asoshi dang masü saka nungdakba mapang yariteptsü aser tajung inyaksü atema telongjem nungdaker. Aji oda, telongjem ajanga tensa mapang tajung - majung ajak nung nübortem taküm aser rongsen kümzüksü aser tajungba küma renlokdaktsütsü asoshi saru sarur, nübo adoker aser mapa tajung inyaker. Iba kasa tangatetba aser tashi jagi tanü ama alima tashidak wara tesashi agi nübortem amokmerendanga lokti tematiba nungi tenzüker tilatiba tashi agi pei akok shilem tajung agiba angur. Ibaji ajak atema mulung anisüngzükdak jangratemtsüka lir. Atangji, asenoki meteta tensa tajung nung mapang talangka lia aruogo, ajisüaka tanübo asenok asoshi kenyongi tetsübuttsü tensa tamajung balakati ait nungji, shiranger mesemdangteter aser asü pila sentepa aika mekatetter aser akayonga nisung aika medentetter. Iba ama shilumanem aser asüama mapang nisung kanga azüngmeyaker aser tasümaait akümer, anungji tensa mejungaka telongjem tapu balala nung lenirtemi item nungdakji meteta pei sensosangertem tasü itdakja inyaksübaji kanga nungdaka kümogo. Lenir ta asüba ya lokti senden nung mendenpurtem asütsü asoshi masü mesüra benjongbentsü nung wajak nung amentsüba maongkaji masü saka tongpangi aodang tama ser anir aotsü aser pei nütsüng nübor timtem aser tetsübu nung aliba tia nungi anitettsü purtem lir. Aji oda, tanü ama alima timtem lendong tulu aruaka lenir aliba agi nütsüng nübortem kecha balaka shisamebulur, kechiyong alima nung nübortem asoshi tenük agi anguba tejenokdak aser jungji lokti telongjem lenirtemji lir. Talisa pei tetsü tasolima adena orr town balala nung alirtem asoshi tanü ama tensa mapang tamajung nung ya pei lokti telongjem lenirtem shisatsü aser nübo kanga nungdaker. Tia majung, tang mapang ya tanga tashidak agi shiranga alirtema teimbaka Corona agi asür, anungji tetsübu aser tarendak agi, tangarjibo yutsür, kinungertemia dena tonga oagi tasü mang anepalua endoktsü tsübur. Ibaji talira tsübuokba agi lir. Iba atemaji taoba Küptoknü (Honibar) nü iba yimobilem nung shisalemsatepogo. Ajisüaka, asenoki asenoksasa tashidak memenatsüsa kümndanga alitsü metetra, kecha balaka tetsübu tarendak makai asüpilajia teronem menema agitettsü. Shidi asünungbo tasü mang dang nung jagibo asenoki dokan nung alia bener aruba jangotsü aser aonsutsü nungjiang tashidak menatsü temelaba, saka tashidak wara tsübuyonga chi mechiyongtsü masüji, anogo shia chiyongtsü dokanbo lapoktsür aser asenoka anogo shia bazaar nungi kidangi chiyongtsü tapu balala bener arur. Iba denji medemdanga, nütsüng nübo ajak mesenzütetaka, lokti telongjem nung lenirtembo tetsübuji tizükteta nübortem mulung anisüngzükja shilem agitsüla. Tang ama wara tesashi asünungji, yimtsüyimpu tajung aika asür, saka temulung ashitsüka, kar asüpila sentong makateter aser ano kar asoshi akayonga akhidang amato asüpila sentong yanglua pei adenba telongjem nungi tepila o ashir kata mali ser rongjenseta yoker. Ajisüaka, yamaji asürjia rongjenseta meyoki aser kinüngertema azüngmeyaka metoktsüi, lokti telongjem tentetem nungi lenirtem karibo mulung anisüngzük o kar danga shia asüpila sentep nung shilem agira, iba jagi telongjem aliba nükjidong tali jangjatsü aser teyaria agütsütetsü. Iba jagi dang tetsübu tanülaji akoktsü aser tetsübu tanüla koktetra tashidak mesenjia koktettsü. Lokti telongjem tentet ya kecha tetsübuttsü tensa maliba mapang dang nungibo tang ama kanga tetsübuttsü mapangang tenungdakba. Tetsübuttsü lendong maliba mapangbo lokti tentet maliyonga mashi nisung kati lokti anir otettsü saka tang ama tetsübuttsü mapang yabo shitakba lokti tentet telongjem lenirtem nungdaker.

OLEMSABANG

Ao oshi ya shir kibur asütsü?


~ S. T. Yapang Lkr. Kohima

(Yashi adok nungi...)

- ASLB kübok Ao Osep yanglutsü luden ka shim, parnoki ASLB tetuyuba kübok manidak, ASLB ajanga adokba Tensenyim-1 nung shia aliba sülen manidak, aser khuli küptok asoshi osang kaket nung junger majung nübur nungi teshidangnüba lira shiang ta lemsatep. Shingaia junger ta mashi, majung temelenshitsüla ta asüba dang zülü, saka parnoki bilembaji tatem sür Ao Osep adok, ano tetamatsüji Aor shingaia aser kecha yimeria mejembiba tzümar o dena aika enoksemer adok, iba tetezüji Ao samadaktsütsü sentong asü tangar oshi indang ka adokba aibelena Ao Osep nung enoksem ta nibo tanü tashi mangateti sungmanger. Iba jaki ang tanaben adokshitsüsa ajuru südi. Yamala tensa nung tobo Ao Senden-i ASLB mesüra ASLB ajanga shimtetsüba ludenji jaoka keno asüngdangtsüa temsüa liasü. Ano yamala mesükba aika ataloktsü nükla nung angur. Kechiyong pei mapang nung pei mulungba zülumen melenshitsü yongyar aika lir, tang aliba ASLB züngsemtem ya tasen agi kenübo melentsü, idangji pa/la shimokra yamai melentsü ta tang yongi tepu metsükshia atadar, tang amshia aliba zülumen aser ojang ya ano tasen agi chipo meyiper ama meyiptsü jilia renema atadar, anungji Ao Senden nung ya süoka jembia joko Ao oshi tang amshia aliba zülumen ya memelenshitsü temzüng ka lateter ASLB züngsem tasen shimdang ibaji metetdaktsütsü tim. Joko zülua amshia aruba ka danga memelenshitsü, tasen kar ngutetra mesüra junga mebenteti alibatem dang melenshiyonga aotsü ta temzüng ka merenemra Ao oshibo ojang aser zülumen melenshiba manentsü. Bilemdangang taküm nung Ao sayuba school nung mazüng, Ao lima nung malir, parnok kidang Ao mejembir; itemla nübu jakia Ao zülumen ya melenshitsüla, ya majung ta asadener nung Ao shia meteter aliri kechiba memelenshinütsü! Saka tejashitsüji temelenshinüba ajakji nisung shia balala aser katia tangari ashiba sülen manidaknür, oda pei bilembaji dang shitak aser aji tatem. Temeim tashirtem nenok tali shia metetba yaki nübur saksünütsü atua laktetogo, joko nenok dak saksüloktsütsü ang anünga lir.
- Ao oshi nung ya yim ajaki tai putettsüsa lir, mesüra nisung shiai temetongshitsü ajitettsü, anungji ASLB tsüngdang teti itemji metongshitsü lenmang sadema lapoka alitsüla, saka nisung shiai melenshiang asüba ajakji angatsü tabo shingaia meimlali, kechiyong jembiyim aser nungjakoja yim shia balala.
- Kaket mesüra Osang kaket adoker aser mopunglushi balala nung zülutepba ajak Ao oshi meima aseni maginüba aika alitsü akok, saka Ao oshi kibur Ao Senden-i shimtsüa aliba ASLB tetuyuba nung anidaka aotsü mapang tongogo. Aseni mamshira shir asoshi yanglutsür asütsü? Aseni asen oshi yanglushiba nung manidaknüra shiri anidaktsü aser iba oshiji kechi tiai aitsü? Takoktsüa sür Tensenyim-1 ya Aor kilen shia lemnütsüka. Iba den Ao oshi asoshi temzüng ozüng mesüra ASLB tetuyuba nung dang anidaktsüsa Ao Senden-i lemteta lira itemjia zülusemer alem nung takoksa malitsü. Ao Senden mungdang jaki nübur ajak oa adener masü aser alemli lateta akaba ka ajaki tetibo mebilemettsü akok. Shibaibo Ao Senden telemtetba ka anema metetsümonga kaket adoktsü! Ajiasünung item ya nübur ajak nem metetjema lidaktsüra Ao Senden nükjidongji temelaba aser tekaraba nung ataloktsü. Oshi, sobaliba mesüra asayaba tapu ajak ama kibur lir mesüra temzüng kaka lateta lir asünungji kiburi koma ka amshitsü/ benshitsü latetja lir, yangji tashi anga anidakdaksüji tim. Au, temetongshitsü mesüra metokmeperi lira aji mashi kati shidangtsüjia lenmang sadema alitsüla, saka kibur alema odi süra kiburi asen sota ayutsü akok.
- Ao oshi nung adokba kakat, osangkaket aser mopunglushi nung zülurtem, azüngertem aser jembirtemi amshinüba ama asen oshi ya ayutsü asü America nunger ka arua pa/la jaki Ao melamela züngtettsüsa yanglutsü? America nunger mesüra tzümar asoshi Ao oshi meyaglutsüli, ano Aorsa sürnung shirnok Ao lima malir, aser parnok kidang tsüraburi Ao mejembiba yong Ao ta asübaji khenyongi memetet, parnoki melamela zünga otettsü nükla meyuli, aji azük nung ozü yimzüba ka aputsü merangdang asen teka nung pua aliba ajak yima odaktsüba den saku asütsü. Shirnoki Ao oshi angazükknür pa/lai asenoki jembiba/züluba amaji angazüktsü tim ashi pa/lai Ao ashitsüba apia asenok oshi mesüra zülumen memelenshitsüla, ajimesüra tsüngpit/tsükmit ozü nashi ola ashitsü merangdang tejejet onteta aoba tatishitsü ya asen Ao oshi dak ataloktsü tsürema bilemer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Crossroads Arogoi NGOs 40 nem sen million 2.5 agütsütsü



Coronavirus prokba nokdangtsü atema tenokdangba aliba agi Ohio nung aliba Crossroads Arogoi moapu nung tekülem sentong agidang anünglen nungi tangokba noksa ka yangi angur.

May 25, 2021: Ohio (United States) nung aliba Arogo tulu kati federal sorkar Paycheck Protection Program nungi sen million aika angutsü aser parnok taruba hopta 25 tsüingda US densema tanga linük aika nung aliba melungtet telok balala nem US sen million 2.5 agütsütsü, ta sangdongogo.

Crossroads Arogo küm 25 ajungba nüngtem nung Arogoi melungtet telok balala nem senotsü tenla agütsür.

Crossroad Arogo tenzüksang aser pastor, Brian Tome-i sangdong ka ajanga, "Tesüiba küm 25 tashi Tsüingremi Crossroads Arogo moaja aruogo, aser onoki iba ya

züba-züba magir, anungji Tsüingremi onok nem moatsüba nungi onoki nüburttem tenzüksü. Iba tetezü onoki mapa tajung inyaker partners den senotsü lemsatepner," ta metetdaksü.

Ki malirtem tenzüksüba telok-City Gospel Mission nem-a sen 100,000 agütsütsü iba sülen ano melungtet telok 39 nem teyari agütsütsü.

City Gospel Mission nungi David Pinson-i, "Yirua aliba nüburttemi teimla angutsü," ta ashi.

1995 küm Cincinnati nung tenzüksüba Arogo nung hopta shia nisung 35,000 tekülem kidangi arur aser tangbo iba

Arogo kübok Cincinnati, Columbus, Dayton aser Lexington nung Tenla ki ter lir.

"Onoki yimti nüburttem dang pelar, aser yimti nung aliba melungtet teloktem dang pelar, anungji onok küm 25 ajungba tenung nung onoki taruba hopta 25 tsüingda US sen million 2.5 lema agütsütsü," ta Tome-i sangdong ka ajanga metetdaksü.

"Tsüingremi onok madak mapa inyakogo, anungji onoki nüburttem tenzüker. Onoki tamasa City Gospel Mission nem US sen 100,000 agütsütsü, iba sülen taruba hopta 25 tsüingda organizations balala yaritsü," ta pai metetdaksü.

Rara aliba Syria linük nung Khristan nütsüng ajema akümer

May 25, 2021: Syriac Catholic Arogoi, tang tashi Syria linük nung tensa kanga majung, aser ibaji ajanga linük nung Khristan nütsüng kanga ajema kümdar, ta metetdaksü.

Putir, Ignace Joseph III Younan-i anüolen aliba linüktem dang, Syria anema r o n g s e n k e t t s ü n g tenokdangbatem benoka aliba agiendaktsüner, kechiyong iba ya ajanga tai maket nisungtem takoksa angur, ta metetdaksü.

Syria semdangba sülen May 23 nü tekülem sentong agiba mapang nung Younan-i, "Democracy aser yimtenren atema anüolen aliba sorkartemi Syria nung rongsenkettsüng tenokdangbatem benokba ajanga küm 10 dak tema rara ajangshiba linük nung sensotemi timtem kanga ajurur," ta metetdaksü.

"Kanga sensakertem aya-tzüra agi timtemer. Mozü aser chiyungtsü maliba den külemi light aser transportation atema totzü mali," ta paisa metetdaksü.

Beirut nung alisang putiri anogo 10 tsüingda Syria nung aliba Syriac Catholic Arogo asem- Homs (central Syria), Aleppo (north Syria) aser Damascus semdanga liasü.

"Syria nung maneni meimchirtem timtemer. Arogotem aser Khristan orgainzations-i yariyonga lanurtem atema tsüraburtemi

shisabulur. Anungji ni anüolen aliba linüktem dang Syria anema benoka aliba rongsenkettsüng tenokdangba ajak agientsü mepishir. Kidanger linüktem nung jenoka aliba nisung million aika pei kidangi meyipa arutsü atema UN-i inyaktsüla," ta pai ashi.

"Anüolen aliba Catholics Khristantemi Syria tensa angateta yaritsüla. Rara agi raksatsüba linük nung Khristantem samadar," ta Younan-i ashi.

Osangbener den jembidang United States aser Canada na nung Our Lady of Deliverance for Syriac Catholics nung tamalen inyaka alisang Younan-isa, "Anüolen aliba linüktemi Syria tensa junga mangateter. Tamangba yimsü temeden melira tanga temeden-a ajak samar. Syria aser Iraq naprongla nung media, yimtenren aser anüolen aliba linüktem nungi sepaitem tiyongtsüi aiba ajanga Khristantemi timtem kanga ajangshio," ta Younan-i ashi.

Syria nung Khristantemi Aid to the Church in Need, Catholic Near East Welfare Association, L'Oeuvre d'Orient aser Catholic Khristantem dang pelar, kechiyong parnok testiiba küm ter tashi Syria nung Khristantem nungta yaria arudar.

May 18-20 anogotem nung Aleppo nung Younan leniba

nung Council of Heads of Catholic Churches in Syria senden amendanga Syria tebilemtsü atema jembia liasü. Iba senden nungji Melkite Catholic Patriarch Joseph Absi aser Vatican nuncio to Syria, Cardinal Mario Zenari nata aden.

Senden nung okila jembidang Zenari-i, US densema linük balalai Syria anema rongsenkettsüng tenokdangbatem benokba ajanga Syria nunger sensakertem taliba timtemer, karibo jana indokba pongdang nungia chiyungtsü bendena achitsüsa akümer, ta ashi.

Kasa senden nung tangartemia Syria anema benokba rogsenkettsüng tenokdangbatem agientsüla, ta lemsatepa liasü.

Alima nung Khristan yimsü tama prokba aser Yisu Khrista tama metetba linüktem rongnung Syria densema lir.

2011 küm tashi nung Syria nung Iraq nunger refugee Khristan mezüngsemi Syria nung Khristan nütsüng million 1.1-1.2 (shilem 5-6) shi liasü. Syria nung Greek Orthodox 500,000, Syriac Orthodox 400,000, Armenia Khristan 70,000-80,000, Catholic Khristan 200,000 den Church of the East (Assyrian) aser Protestant Khristantem-a aika liasü, saka tangbo linük nung Khristan nütsüng kanga ajema kümogo.

ANO GO ABEN TSÜNGREM DEN

Tekümtet Tsüingrem nungi dang

"Ano tanaben ni nenok dang ashir, takar nisung kati Tsüingrem yimli-i aitsüba dang nungibo ajem ki ka ateta ut aotsü temelaba". Mathi 19:24

Yihuda nunger asoshi, azükaru aser rongsen kaaita alibaji Tsüingremer temoatsü aser Pa adenba temaitsü ta angateta liasü. Iba ama tensa ka nung Yisui nisung ka Tsüingrem yimli-i aitsüba dang nungibo ajem ki ka ateta ut aotsü temelaba ta jembiba angashia Yisu nütsüngtem janga süngmangtep. Tsüingremi moatsüba takar kati Tsüingrem yimli-i meitetra shibasa kümzüksü ta rata.

Yisui nütsüngtem dak rangloka ashi, "Nisungtem asoshi ya tamakoktsü, saka Tsüingrem asoshibo ajak takoktsü." Mathi 19:26. Yisui parnok dang shinübaji, nisungi pei sasa tekümtet angutsü tamakoktsü, saka Tsüingremi nisung ka nem Yisu ajanga tekümtet angati agütsür. Tanur, tain, takar aser sensaker tebensa kecha mali Tsüingrem taochi ajanga dang kümzüksü akoker. Ut-i ajem ki ateta otetba ama tekümtetji Tsüingremer tesüngmangtsü mapa lir. Saka mapa tajung inyakba, tenla agütsüba, Arogo aser lokti tenzüksüba agi tekümtet aazüktsü makok. Sixteenth Century mapang John Calvini ashi, Pei tashi agi tekümtet angutsü merangra, "adangji tesamaba ajurutsü".

Sarasadem

Yisu nai angati tekümtet bener arutsüba asoshi kanga pelar. Ya tesüngmangtsü mapa lir. Oba Ne nüng asanger. Amen

Myanmar nung sepaitemi Tenla ki ka amakdang nisung pezü khaset

May 25, 2021: May 24, 2021 nü anüdoklen Myanmar nung Burmese sepaitemi Catholic Arogo Tenla ki ka amakdang Khristan pezü süogo.

Taküm February 1, 2021 nü Myanmar nung sepaitemi democracy lenirtem apuba sülen sepaitemi yimsüsüba mapang nungi tenzüka tang tashi nung sepaitemi Khristantem aser Arogo aika maakogo.

Sepaitemi amakba Tenla ki moapu nungji tesem balala nungi jena arur nisung 300 shi jenokdakja liasü. Taoba hopta nungi tenzüka sepaitem aser People's Defense Fource (PDF) na tsüingda rara tamajungba akümiba sülen nisung aika iba Tenla kidangji jenoka liasü.

May 24 anepdang züingia 1:00 ako meta sepaitemi Kayah state yimtiba, Loikaw anasa aliba Sacred Heart Church Tenla ki amak.

Ministry of International Cooperation, National Unity Government of Myanmar-i sangdong ka ajanga, sepaitemi shells amshia Catholic Tenla ki amakba osang metetdakja liasü.

Taoba hopta tatembanglen sepaitemi yim ka amakba ajanga kanga taintem aser tanurtem

aika kidang nungi ajenba sülen iba Tenla kidangji jenoka liasü. Sepaitemi Tenla ki amakdang Tenla ki kilem, tsüingbang aser Kangki raksatsü; nisung pezü khaset aser nisung pezü yiruja liasü.

Myanmar nung rara adoka aliba tesemtem nungi nisung meyirjang aika jenshia Tenla kitem, monasteries aser convents nung jenoka lir.

Loikaw nung aliba Arogo nung otongdar, putir Soe Naing-i, May 24 anepdang Arogo ketdangsertemi Tenla ki teraksatsüba asadangtsü atema Tenla ki tonga aoba mapang nungji Tenla kidang jenoka alir ajak jenshir liasü, ta metetdaksü.

UCA osangbener den jembidang putiri, "Arogoi meimchir temeim mapa inyaker saka rara tali bulua akümiba ajanga nisung aika jenshia tejenokdak bushiba ya Arogo atema tebilemtsü onük tuluka kümogo," ta metetdaksü.

Taoba hopta nungi anüdoklen Myanmar nung rara tamajungba kümogo, talisa Kayah state kübok Demoso jila aser Moby jila nung tensa kanga majung.

OLONG PAITEP # 5823

	1			2		3		4
5						6		
7		8						
						9		
		10						
11								12
				13				
				14				
15								
				16				

TIPLÉN

- 1. Balaka
- 6. Aika shirangba
- 7. Tar tatsü
- 9. Nenü'er jabaso
- 10. Sen latettsüba
- 11. Tangar kübok alir
- 14. Lon nung inokba
- 15. Tzü ayimdak
- 16. Ajok

LANGTSÜNGLEN

- (5) 2. Hai sür inyak - (4)
- (4) 3. Aor tenüng ka - (6)
- (6) 4. Ali telungi talangka lur - (5)
- (4) 5. Tebang kenyongi mazüoker - (4)
- (5) 8. Ken atema anenzükertem - (5)
- (5) 9. Toktepa noktak - (5)
- (6) 10. Sen - (6)
- (5) 11. Benjong agi - (5)
- (4) 12. Telung nung rizünga ayu - (4)
- (4) 13. Tebang nung enok - (4)

OLONG PAITEP # 5822 TELANGZÜBA

TIPLÉN :

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket, 14. Mangu,
- 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem,
- 9. Süjak, 10. Aonung, 11. Dokan,
- 13. Tinu.



TANÜBO NAI LANGZÜANG

Q. Gharial Crocodile indang IUCN Status ji koba?

- A. Endangered
- B. Critically Endangered
- C. Vulnerable
- D. Extinct

(Taruba adok nung onoki langzüsü)

YASHI ADOK TELANGZÜBA : 2018

AO OSHI ANGAZÜKDAK:

TANÜ ANGAZÜKTSÜBA OJANG

Jangra

(v) Inyaknüba mesüra aginüba (Interest)
* T.Aoi football asayatsü kanga **jangra**.

Jangru

(v) mi tulu adokba (inflammation)
Süng taro takong asüba agi mi kanga junga **jangru**.



Tir Yimyim

NAI-A YA METETTER MA?

MAY 26 NÜ ASOR TONGTIBANG NISUNG KAR:

- Dancer Isadora Duncan (1877)
- Entertainer Al Jolson (1886)
- Actor John Wayne (1907)
- Actor Jay Silverheels (1912)
- Actor Peter Cushing (1913)
- Singer Peggy Lee (1920)
- Actor James Arness (1923)
- Jazz trumpeter Miles Davis (1926)
- Right-to-die advocate Jack Kevorkian (1928)
- Singer Stevie Nicks (1948)
- Singer Hank Williams Jr. (1949)
- Actor Pam Grier (1949)
- Actor Philip Michael Thomas (1949)
- Sally Ride (first U.S. woman in space) (1951)
- Musician Lenny Kravitz (1964)
- Actor Helena Bonham Carter (1966)
- Singer-songwriter Lauryn Hill (1975)
- Actor Astrid Berges-Frisbey (1986)



Astrid Berges-Frisbey



Lenny Kravitz

SUDOKU # 5866

TELANGZÜBA # 5865

4	5		7	1		3			4	9	7	6	3	2	1	8	5
2	1	7		8	3	9		4	6	1	8	5	7	9	2	3	4
6	3			4	5			2	5	3	2	8	4	1	7	9	6
5		4	1	3	7			6	2	5	9	3	8	6	4	1	7
	2	1	4		9				7	6	1	9	2	4	8	5	3
			5				3		8	4	3	1	5	7	6	2	9
	7	3	2			8	4	9	3	2	6	7	1	5	9	4	8
	6	5				1			9	8	4	2	6	3	5	7	1
			3			6			1	7	5	4	9	8	3	6	2

OJANG LUTEP # 5409

- UMEMERRUA :
- MABILE :
- NGUABA :
- AKAJ :
- INÜAGA :
- AKDAINYNG :
- TETMEMEI :
- ENETEMN :
- ATSMENÜSA :
- MERAKÜ :

OJANG LUTEP TELANGZÜBA # 5408

TESEM KAR NUNGBO TIA JUNGA TEMOATSÜ MASÜ
TIMTEM LENDONGANG AJURUR

TAN HOPTA ATEMA - KOMA SÜLA ?

Q. Tenla ki shibangtsüba masü lokti sentep malitsü ashiba dang, anungji asenok arogo shia nung lokti sentep mali tashi tenla ki azünga metoktsüi nisung ishishi lemsar kena manen sarasademba yinzü, Chain of Prayer, sentong tenzük nunga koma süla ?

India nungi Japan-i arurtem anogo 10 quarantine asütsü

Tokyo, Monupii/May 25 (Agencies): Tawa India aser South Asia linük pongui orr arurtem quarantine mapang Japan-i Mongulbarnü atsülangtsüogo. B.1.617 Covid-19 variant kanga kara prokshia aoba atema tebilemtsü kaa iba jenjang agi.

Japan sorkari ashiba agi, nüburtem shirnoksa tawa India, Bangladesh, Maldives, Nepal, Pakistan aser Sri Lanka semdangogo, parnok anogo trok melena anogo 10 quarantine asütsü.

Sorkarisa, Kazakhstan aser Tunisia-i orr arurtem anogo asem quarantine asütsü benokogo aser tasemübuba nung coronavirus tashidak tendangtsü, ta Kyodo News sangdong ka ajanga metetdaksü.

Iba jenjang ya Hokolbarnü nungi benoka agitsü.

Japan-i bendangertem linüki arutsü memelar. Tenokdangba agütsür alirtem rongnung resident status bena alirtem densema lir, shirnok taoba hopta ana tsüngda linük trok semdangogo, ajisüaka kuli tejangja alirtembo arutsü melatsü. Iba jenjang agiba

ajanga Japan nungertem dak kongshir.

"Coronavirus tapu tasenba dak sendakba nung Japan nungertem kanga animesüngzükteter, anungji onoki nüburtem health aser taküm kümzüka ayutsü atema arrtsü tali takangba shibangtsü telemtetba agiogo," ta Chief Cabinet Secretary Katsunobu Kato-i osangbener den sensaksema mapang ashi.

Japan nung yashi tashi nung nisung 718,864 dak coronavirus tashidak potetba sangdongogo aser iba tashidak agi nisung 12,312 süogo. May 15 nü tashi nung Japan nung vaccine dose 5,593,436 agütsüogo, ta World Health Organisation sangdong ka ajanga metetdaksü.

Japan nung vaccine kanga meyilongi agütsüba atema sorkar aitsüba mapang ka nung Hombarnü covid vaccine agütsüba centre ana amenokogo, kong tintet rogotem nem tama vaccine agütsütsü. Tokyo aser Osaka nung amenoker aliba vaccine centre nung anogoshia nisung 15,000 shi nem vaccine agütsütsü sentong lir.

Kabul nung Australia embassy shibangtsü: PM



Scott Morrison

Sydney, Monupii/May 25 (Agencies): Afghanistan nung Australia indang embassy iba hopta shibangtsü, ta Ato Kilonser Scott Morrison-i Mongulbarnü metetdaksü. Kabul nungi bendanger sepaitem atsüngina aoba ajanga security dak sendakba nung tensa mejangjai kümogo, aser iba dak ajemdaker embassy shibangtsü telemtetba agia liasü.

Morrison-i ashiba agi, Kabul nung Australia embassy ya khen atema May 28 nü nungi shibanga atatsü. "International military Afghanistan nungi atsünginba ajanga iba jenjang agir," ta pai ashi.

United States-i Afghanistan nungi parnok sepaitem anin tenzükogo aser iba ajanga America nung rara talangtiba tatembang ka dangi aruogo, ajisüaka Taliba puri linük tali azüoktsü merangdang tenzükogo aser linük tarutsü

mejangja kümogo.

Küm metsü tashi bendanger linük temi teyari balala agüjaka Kabul nung sorkar aser Afghan security services ano tashi mait, aser US teyari medeni takok angubatam kecha mali.

US sepaitem ajunga September 11 nü tashi nungbo Afghanistan toktsür aotsü imlar.

"Australia-i khen atema iba jenjang agia atar aser tia tensa agi melaba mapang maneni Kabul nung teti atema embassy amenoktsü," ta Morrison-i ashi.

Australia nung sepaitema Afghanistan toktsür aotsü. Linük sen billion aika intoka inyakba sülen maparen tembanger sepaitem pei kidangi meyipa ao tenzükogo.

US sepaitem aser Australia nung sepaitem tera ya atsünginba ajanga security dak sendakba nung tensa mejangjai kümogo, ta Morrison-i ashi.

Malaysia nung passenger train ana tsüktep; nisung jenti yiru



Kuala Lumpur, Malaysia nung KLCC station anasa train ana tsüktepba nungi ketdangsürtemi yirur alirtem anizükba mapang tangokba noksa ka yangi angur. Iba lendong nung nisung 213 dak tema yiru, ta Transport Minister Wee Ka Siong-i ashi.

Kuala Lumpur, Monupii/May 25 (Agencies): Malaysia yimtiba, Kuala Lumpur kübok Petronas Twin Towers anasa lai telung nung lenmang yanglua alidak (underground tunnel) train ana lenmang kasa nung ajurutepa tsüktepba lendong nung nisung 200 dak tema yiru, koba nisungi aibelenba lendong ka lir, ta Transport Minister-i ashi.

Hombar aonung 8:33 ako (par mapang) meta yanglushir aliba train tazüng ka aser passenger 213 mena aliba train ka kasa lenmang nung arua tejak o tejak jitepa liasü.

Social media nung noksa aser video prokshiba nung yirur aliba passenger tem azü agi yimpanger kar mena liasü aser kar ali nung mejanga liasü.

Nisung 47 kangasa mejungi yiru aser ano nisung 166 tera

yiru, ta district police tekolakba, Mohamad Zainal Abdullah-i lendong atalokba tesem nungi osangbener dang ashi. Tekumzüker temi yirur aliba nisungtem ya longpok temesü nungi minute 50 shi nung aniteta liasü.

Nisung 64 tang tashi mozüki nung anepal arer item rongnung nisung 15 kanga mejungi yirua lir aser trok intensive care nung lir, ta rail ketdangsür Prasarana-i Mongulbarnü ashi.

Iba lendong ya KLCC station nungi meter 100 shi pilar longpok nung atalok.

Iba lenmang nung automated train tem driver maden amshir, saka train tazüngba ya nisungi anir liasü.

"Onoki iba tatalokba bushisüngdang... saka trains' operations control centre nungi osang meshidak

agitep südi ta temolung malemer," ta Abdullah-i ashi.

"Train ya minute 15 anenba sülen lendong ya atalok. Onok ayamesor second 10 shi lir kanga sashia tsüktep," ta train nung mena alir Afiq Luqman Mohd Baharudin-i ashi.

Train yanglushir aliba yagi lenmang tai nung jaja aser iba train ya meyiper aor ta osang aruba sülen nisung mena aliba train ya KLCC station yutsür aotsü mela, ta bushiteta lir, ta Transport minister Wee Ka Siong-i Mongulbarnü ashi.

Train ya ka ghonda ka nung kilometer 40 aser ka ghonda ka nung kilometer 60 tashi kera jaja liasü, ta Wee-i ashi.

Ato Kilonser Muhyiddin Yassin-i transport ministry aser Prasarana dang iba lendong kanga junga bushisüngdantsü totuyuba agütsüogo, ta Twitter nung ashi.

Mali mitkari linük tir aser ato kilonser pua lir

Bamako, Monupii/May 25 (Agencies): Mali nung mitkartemi khen atema tenteta aliba sorkar indang tir aser ato kilonser pua lir, ta United Nations aser African Union ajanga ashir, kong mitkartemi tashiyim amshia taoba lenir atsüngdoker ita tuko dang lir yimtenren nung mangatetep tamajungba

akumer. Sorkar nung ketdangsürtem melentepba nung taoba küm August ita mitkar tashi amshia sorkar atsüngdokba lenir ana medendaktsüba ajanga ghonda ishika lir Hombarnü Tir Bah Ndaw aser Ato Kilonser Moctar Ouane na Hombarnü apu aser mitkartemi sorkar tanaben atsüngdoktsü tetsübu

nung lir. UN aser AU ajanga lungjemer sangdong ka agütsüba nung Mali indang civilian lenirtem tekeratiba nung talenba kecha makai chiochtsü akhang aser tashiyim amshia mapa nungi anendaktsüba inyakyim linük balalai aitsür, ta ashi.

(Maneni tapak 9 nung...)



Bogota, Colombia anasa San Mateo nung sorkar anema longkak aitba mapang rongtsüba double car public bus ka gari kati atsür aoba noksa nung angur. Public services, totzü, taa aser pension nung saru temlochtsü atema sorkari ken o benokba sülen Colombia nüburtemi hopta aika yimti-yimtung nung longkak aita jajar.

BTS indang 'Butter' ajanga Spotify nung otsü tasen yanglu



Seoul, Monupii/May 25, 2021 (Agencies): Nüngtugu K-pop telok BTS indang ken tasenba ajanga maneni record tasen yangludat. BTS pur ken "Butter" ajanga Spotify indang 'single-day streams list' nung temaba jenjang tongtetba den külemi Mongolbarnü YouTube sabang nung view million 200 tongogo, koba music video view rongnung "Butter" video ajanga mezüing iba alizüing tongteter alitsü.

English oshi nung adenba summer dance-pop track - Butter ya taoba Hokolbarnü saya aser iba ken sayar anogo pezü ser ghonda ka nung view million 200 ajangtetogo, ta Mongolbarnü BTS' management company Big Hit Music-i ashi.

Iba ken ajanga BTS pur indang taoba record ajatetogo. Taoba küm August ita parnok indang single "Dynamite" ajanga otsü tasen yanglua liasü, saka

anogo pezü ser tesadangka nung ken tasenba ajanga iba record menepogo.

Butter track sayar mezüing ghonda 24 tsüingda, YouTube sabang nung, iba video ya million 108.2 ben reprangadoker liasü aser iba ken premiere asüba mapang '3.9 million concurrent views' tongtet, koba telok indang taoba english track "Dynamite" ajanga tongtetba record ajangtet.

Alima nung streaming sabang tulutiba - Spotify nung, mezüing anogo "Butter" ken sayar stream million 20.9 dak tema atu, koba Spotify sabang nung timtiba alitsü.

Deobarnü, Billboard Music Awards nung BTS telok yagi award anguba sülen parnoki ano record tasen yanglur alitsü. Iba sentong nung par teloki "Butter" ken aten aser top duo/group, top song sales artist, top social artist den top selling song category' nung award pezü tashi takok

angu.

"Butter" track ajanga South Korea aser Japan local music chart nung temaba jenjang tongtetba den külemi United States, Britain, Canada aser Germany densema linük 100 tema nung iTunes chart indang temaba jenjang ajangzüketogo.

BTS indang ken ajanga takok anguba atema, Mongolbarnü, The Late Show with Stephen Colbert nung shilem agitsü maangka angu aser iba dak alia Hokolbarnü Good Morning America summer concert series nunga par teloki shilem agitsü terenemba lir.

Maneni, züingsem tenet - Jin, Suga, J-Hope, RM, Jimin, V aser Jungkook nung dena aliba BTS telok yagi taruba ita - June 13 aser 14 nü online fan event ka ayongzüksü tebilemba lir. BTS telok tenteter küm 8 ajungba nungtem nung iba sentong ayongzükur.

Mali mitkari linük tir aser...

(Tapak 8 nungi...)

United States, United Kingdom, France, Germany aser West African regional bloc, koba dang ECOWAS ta ajar, parnok ia sangdong nung meyongnem agüja lir. ECOWAS nungi teshimtet telok kati Mongolbarnü linük yimtiba, Bamako semdangtsü, ta sangdong ajanga ashi.

Ndaw, Ouane aser Defence Minister Souleymane Doucoure nungtem ya Bamako tezülen Kati nung mitkar amenoka alidak pua yua lir, ta osang balala ajanga ashi.

Osangbener temi Ouane den khen jembitet aser idangji, mitkartemi pa aputsü aru, ta ashi. Sangdong ajangasa Ndaw aser Ouane apuba ya junga masadangi inyakba mapa ka lir, ta aitsü aser Mali indang yimtenren temelenshi ya lateta aliba mapang nung tembangtsüla, ta ashi.

UN Secretary-General Antonio Guterres-ia Twitter nung Mali atema süoki ia bilemetsüba lemsatep aser

süingjemsü ajungshi, aser külen European Union lenirtemibo, 'Mali civilian lenirtem tashiyim agi pua bener ao,' ta aitsü.

"Mali nung kechi atalok, ibaji kangasa majung lir aser onoki nungdakba mera agitsü atema asadangtsü renema lir," ta EU Council indang bloc 27 lenirtem senden ka amenba sülen EU Council Tir Charles Michel-i osangbener dang ashi.

Taoba küm August ita mitkartemi tashiyim amshia Tir Ibrahim Boubacar Keita menden nungi atsüingdoker transitional government nem tashi agütsütsü Mali mitkar lenirtemi molungtepba sülen taoba mapang sepai inyaka alisang Ndaw aser Ouane na September ita tenangzüktep agia liasü.

Mitkar lenir Assimi Goita ya vice president shimtet aser caretaker administration ajanga anepalua ita 18 nung civilian nem yimten tashi meyipa agütsütsü mapa nungloktsü. Mitkartemi sorkar atsüingdokba

mapang tongti shilem agir ana - Sadio Camara aser Colonel Modibo Kone - nem defence aser security mapa lemzüksü.

Hombarnü ketdangsur melentepba nung Camara aser Kone na melena liasü.

Camara aser Kone na medendaktsüba atema kuli kecha magütsü aser khen atema tenteta aliba sorkar yagi mitkartemi amokbanga aliba sorkar tashi kokteta melenshitsu aser taruba küm election agitsü tashi mali südi ta civil society telok balalai temolung melemba jembia liasü.

Mitkar mesüra sorkar nungi Ndaw aser Ouane apuba indang osang kecha sangdonga mali aser Hombar aonung tashi Bamako yimti süngjema liasü.

Kati nungi mitkar lenir kati osangbener dang, parnok ya apuba masü, ta ashi.

Cabinet melenba mapa ya parnoki meshidak inyak aser iba atema onoki metetdaksüba dang alitsü, telemtetba agitsü, ta pai ashi.

India nung 'Sputnik V' yanglu tenzükogo

New Delhi, Monupii/May 25, 2021 (Agencies): India nung Covid-19 vaccination drive mapatong ajungkettsütsü nükjidong nung, Hombarnü linük indang vaccine aser pharmaceutical firm tongti temi Russia indang sovereign wealth fund den longjemer India nung Sputnik V yanglutsü atema maparen tenzüksüogo.

Russia indang Direct Investment Fund den Delhi indang Panacea Biotec longjemer Sputnik V indang dose million 100 yanglutsü, koba coronavirus anema raratsü asoshi alima nung mezüing

RDIF sangdong nung shia lir.

Taküm April 12 nü India nung emergency atema Sputnik V vaccine amshitsu temelaba agütsü aser India nung coronavirus anema raraba mapatong shilem ama Russia nung yangluba vaccine ya May 14, 2021 nungi agütsü tenzük.

"India nung Covid-19 wara anema raratsü asoshi Panacea Biotec den longjemer India nung iba mozü yanglutsü tenzükba maparen ya tongtibang mera ka agiba temaitsü lir. Coronavirus wara akok tashi takaraba nung nokdangtsü asoshi Sputnik V yangluba ajanga India nung



register asüba vaccine alitsü, ta RDIF sangdong ka ajanga metetdaksü.

Baddi kübok Panacea Biotec indang facility ajanga yangluba vaccine mezüing shilem ya quality check atema Moscow kübok lapoka aliba reju Gamaleya-i yoktsü. Gamaleya nung iba vaccine (Sputnik V) yanglua liasü. India nung iba vaccine yangluba facility yagi GMP standard nung anidaka achayangtsü aser iba maparen atema World Health Organisation (WHO) ajanga jelia temelaba agütsüogo, ta

tekolakpurtem maparen pusemer. Ano külen, tanga linük nunga iba virus prokba aziüktsü asoshi tatsüka lir iba vaccine ya bendanglen linüktemi yoktsü sentong lir," ta RDIF CEO Kirill Dmitriev-i ashi.

"Onok longjemer Sputnik V yanglutsü maparen tenzükba ya tongtibang mera agiba temaitsü ka sayur. RDIF den longjemer iba mapatong tenzüksüba ajanga, linük aser alima tesem balala nung nüburtem nem anisüingzük agütsütsü onoki imlar," ta Panacea Biotec MD, Dr Rajesh Jain-i ashi.

SC-i Bengal sorkar...

(Tapak 7 nungi...)

Anand-isa, court dang NHRC, NCW aser NCPCR ya petitioner ama züngoksemtsü aser parnok nem notice agütsütsü mepeshia asüingdang.

Court-i pa temepeshiba agizüka NHRC, NCW, NCPCR, National Commission for Scheduled Castes and National Commission for Scheduled Tribes züngoksemogo.

Petition nung May 2 nü assembly election result sangdongba sülen, rakzükkrademba, tetsürtem dak tashiyim benshiba aser nisung tepsetba lendong aika atlok, koba Bhartiya Janata Party (BJP) dak sendakba aliba kibongtem dak rangloker inyak. Petitioner tem rongnung tongtiba Mukherjee, shibai linük ajunga nung Bengali nung ajangzüksü atema lokti tentet ka achayanger, pa dangi state nung timtem agi kongshir aliba kibongtemi call asü. Pei taküm samatsü tsübu kibongtem aika pei ki aser mapa toktsür state nungi jena ao. Item kibongtem ya Assam nung camp balala nung jenoka lir.

Petitioners temi Special

Investigation Team (SIT) ka tenteta ken o benoktsü aser bushitsüingdangtsü mepeshia asüingdangogo. Iba den bendenloksema nisung aka pei ki toktsür aotsüsa akümba kuli bushitsu atema inquiry commission ka amenoktsü akhang.

Maneni parnoki, asürtem, kiojen, mapa aser lendong atalokba ajanga tekelok mesüingjemeti küm daktsüba atema teyari agütsütsü khangogo, kechiyong item kibongtem covid wara pokteter aliba mapang kanga timtem tekangshi nung litepdar. Parnokisa court dang item nisungtem nem chiyongtsü, mozü, pandemic resources aser medical facilities tapet agütsütsü atema tetuyuba agütsütsü mepeshia asüingdangogo.

Petitioners temi bendena aliba data ajanga Bengal kübok Coochbehar, Kamakhyaguri, Tufanganj, Alpiurdaur, Falimari, Rampur yimtsüing nungi jena aoertem Assam kübok Rangapali aser Srirampur refugee camp nung jenoka lir, ta sayuogo.

PSL nungi Naseem Shah agienogo: PCB Project ka nung Debra Messing aniok



New Delhi, Monupii/May 25, 2021 (Agencies): Pakistan Super League (PSL) 2021 indang tanungba asaya nungi fast bowler Naseem Shah agienba mapang, iba inyakyim ajanga Pakistan Cricket Board-i asayartem, support staff aser tanga stakeholder tem dang Covid-19 protocol nung aibelener atema tatok maliba osang tejanga ka sangoktsüogo.

Iba asayamung (PSL) indang Covid-19 temzüng nung aibelenba sülen, taruba ita nungi Abu Dhabi nung asayatsü aliba PSL tanungba asaya nungi Naseem Shah agiena liasü. Hombarnü, arishi küm 18 tain aser fast bowler Shah-i Covid-19 negative test report tejen ka bener Lahore kübok team hotel tonga aru.

Bodhbarnü Abu Dhabi-i aotsüpur asayar ajak team hotel tonga arutsü ghonda 48 tsüngda agiba Covid-19

negative test report sayutsüla ta PBC temzüng nung renema lir. Hombarnü, Shah-i May 18 nü agiba test report ka bener aruagi sayu.

PCB-i ashiba agi, PSL indang medical advisory panel, kong züngsem asem dena lir, iba committee ajanga lemetetba nung anidaka, Shah ya tanga asayar nungi pilar takdang balaka nung yur sülen ang iba hotel nungi yokadok.

"Iba marquee asayamung nungi asayar tasen ka yokadokba inyakyim nung PCB-i iba ama inyakyim ya konang ka ama magir, saka asayar kari mekümdangi inyakbatem züba züba toktsüra, iba jagi asayamung ajanga lendongbang nung yutsür," ta PCB indang director commercial Babar Hamid-i ashi.

Hamid, shiba PSL nung tekolak ka ama lir, pai ashiba agi, iba asayamung nungi Shah

agienadokba ya, PSL asayamung nung dena alir tanungba asayartem aser staff ajunga atema tekümdangtsü osang ka ama lir.

"Asayartem süshia mesüra support staff tem, parnok asaya mesüra inyakyim nung jenjang kodaka junga liaka, renemba temzüng mesüra tetuyuba tem nung aibelenra PBC-i tai matoktsü aser iba asayamung nungi agientsü asoshi telemetba agiogo," ta paisa ashi.

Iba Pakistan Super League nung Quetta Gladiators atema Shah ya tongtibang asayar ka akümtsü liasü. 2019 küm Pakistan team tenung nungi pai Australia den mezüng Test asayaba mapang, pa dak asayatsü sempet tajung aliba ajanga Shah nungtugu aküm. Iba sülen, taoba küm Rawalpindi nung Pakistan aser Bangladesh na tsüngda Test asaya ka nung Shah-i hat trick agia lir. Shah-i Test match 9 nung asayaogo aser item asaya nungi pai wicket 20 agia lir.

PSL atema franchise trok nungi asayartem tan hopta Abu Dhabi-i aotsü renema aliba mapang, iba asayamung tanungba asaya 20 atema PCB-i ano schedule memetetdaksü.

Pakistan indang nungtugu domestic Twenty20 league tasayadak nung franchise trok nungi asayar aser support staff tem dak Covid-19 positive putetba sülen, iba asayamung atemtsü asaya 20 anünga lia March ita iba League asayatsü anogo atsülangja liasü.

India cricket team anaprongla bio bubble nung denogo

Mumbai, Monupii/May 25, 2021 (Agencies): Mongolbarnü India captain Virat Kohli, white-ball deputy Rohit Sharma aser head coach Ravi Shastri nungeri England tour nung shilem agitsüpur squad indang bio-bubble nung denogo. Külem tebur team den anogo 8 tashi hard quarantine asütsü atema, kasa anogo India tetsür cricket team-a iba bio bubble nung denogo, ta sangdong ka ajanga metetdaksü.

Mumbai kübok international airport anasa aliba Grand Hyatt nung National cricket team anaprongla anogo 8 hard quarantine asütsü. Anogo 8 quarantine asüba mapang, team anaprongla nungi asayartem aser staff züngsem ajak asemen tashi RT-PCR negative osang sayur sülen ang June 02, 2021 nü team anaprongla England-i aotsü imlar.

India tebur team-i England den series ka masayadang, June 18, 2021 nü tenzüka parnoki New Zealand team den mezüng World Test Championship final asayatsü. WTC final masayadang, June 16, 2021 nungi India tetsür team-i asayamung ayonger telok England den Test ka, ODIs asem aser T20 International asayatsü terenemba lir.

"Wriddhiman aser Prasad Krishna Covid-19 tashidak nungi taneptsü anguba sülen, tesüiba anogo ana tejakdang asayar anaprongla iba bubble nung denogo. Mumbai nung alir asayar talisa Virat, Rohit aser coach Shastri nungera iba bubble nung denogo," ta BCCI sangdong ka ajanga osang jangjatsüogo.

Sangdong tanga ka ajanga angazükba agi, asayar kibongtem parnok den külemi England-i aotsü melatsü asoshi osang atadar, saka BCCI-i iba

maparen takaratiba nung achaayangtsü imlar.

"Ita asem atema aser aja bio bubble ka nung onoki asayartem parnok kibong nungi pilar yutsütsü tasak asütsü. Parnok pilar yutsütsü ya tamakoktsü aser iba ya temulung agi magizüker," ta sangdong nung shia lir.

Team anaprongla England tonger sülen parnok quarantine asütsü atema latetja aliba mapang tatsüba kümtsütsü asoshi jembishinüdar aser hard quarantine (pei pei hotel takdang nung amungb) ya anogo ajemtsütsü akok.

Item asayamung dak sendakba nung sensaksemba mapang England Cricket Board-i BCCI dang asaya anogotem melenshitsü makoktsü ta osang agütsüba sülen, iba five-Test nung temelenshi kecha madoktsü akok, ta sangdong ajanga metetdaksü.

Monupii/May 25, 2021 (Agencies): '13: The Musical' project nung actress Debra Messing-i tongti shilem agiba angutsü.

Nungtugu Broadway show nung ajemdaker yanglutsü aliba Netflix film nung arishi küm 52 actress Debra anisemogo aser iba musical film ya Tamra Davis-i direct asütsü.

'13: The Musical' ya arishi küm 12 tain Yihuda nung Evan Goldman-i New York City nungi Indiana tashi oa pa indang taruba Bar Mitzvah atema renemshiba aser pa azüngba school nung timtem balala adokbatem pai asadangshiba otsü ka asütsü.

Iba film nung Debra-i Evan indang tetsü ama shilem agitsü aser tena den Eli Golden, Gabriella Uhl, JD McCrary, Frankie McNeills, Lindsey Blackwell, Jonathan Lengel,

Ramon Reed, Nolen Dubuc, Luke Islam, Shechinah Mpumwana, Kayleigh Cerezo, Wyatt Moss, Liam Wignall aser Khiyla Aynne nungeri külemi shilem agiba angutsü.

Robert Horn aser Dan Elish nati züluba kaket ka nung ajemdaker, Robert-i iba film atema screenplay zülutsütsü aser Neil Meron producer ama inyaksü. Iba project atema Jason Robert Brown-i music tasen mejemtsü aser pai Davis, Horn, Mark Nicholson o Bob Boyett nung den longjemer executive producer ama inyaksü.

Taoba mapang, nungtugu comedy series - 'Will & Grace' nung Messing-i Grace Adler ama shilem agiba ajaki jangjaa lir. Iba show nung shilem agiba mapang, Messing-i la temang touzük ajemdaksütsü asoshi timtem jenti ajangshiba lemsatepogo.

Asian Boxing Championships: quarter final nung Amit-i Kharkhuu den tsüngteptsü



New Delhi, Monupii/May 25, 2021 (Agencies): Bodhbarnü, Dubai nung Asian Boxing Championships nung shilem agitsüpur India nung tebur pugilist Amit Panghal, Vikas Krishan aser Ashish Kumar nungeri tetokteper tajung den asayatsü terenemba lir.

Tebur 52 kg bout nung, World Championships silver medal angusang aser defending champion Panghal-i Mongolia nung Kharkhuu Enkhmandakh den tsüngteptsü.

Taoba küm, Amman, Jordan kübok Asian Olympic Qualifiers asayamung nung Amit aser Kharkhuu na tsüngteptsü mapang, Amit-i iba bout makokdang Mongolia nung boxer yagi pa den kanga meranga tsüngtept.

Tebur 69kg category' nung Asian Games champion Vikas Krishan-i Iran nung Moslem Malamir den tsüngteptsü. Ashish Kumar (75kg), shibai

taoba asayamung indang tatembuba edition nung silver medal angu aser külem India nung Narender (+91kg) nati Kazakhstan nung boxer tajung ana den asayatsü terenemba lir. Ashish-i World Championships aser Asian Games silver medal angusang Abilkhan Amankul den tsüngteptsü. Kasa mapang, Narender-i two-time world championship silver medal angusang Kamshybek Kunkabayev den asayatsü.

India nung pugilist rongnung, national champion Varinder Singh (60kg)-ia pa tata asaya nung India atema medal takok angutsü teimla lir. Lightweight last-eight bout tetokteptsü nung Singh-i Philippines nung Jere Cruz den tsüngteptsü.

Hombar aonung, 81kg opening round bout tetokteptsü nung India nung Sumit Sangwan-i 5-0 agi Iran nung boxer Meysam Gheshlaghi makok.

BILEMDANGANG

"Mapang tajung ajakji pei meyong dangbo masü."